

26/11/2003

`Semoga lebaran beri keinsafan'

Akmal Abdullah; Khairull Azleyana Ishak

SEMPENA Syawal yang mulia ini, pasti ramai yang menghantar ucapan dan mesej sebagai lambang pengerat silaturahim. Persada Seni tidak ketinggalan mendapatkan ucap selamat Aidilfitri daripada presiden dan pengerusi persatuan dan organisasi hiburan tanah air. Tanpa mereka yang menjadi tulang belakang industri hiburan Malaysia, tentu warga seni dan karyawan tidak terbelah.

M DAUD WAHID (Presiden PAPITA)

"SEBAGAI persatuan anak seni, saya bagi pihak penggiat muzik menyampaikan salam Aidilfitri buat rakyat Malaysia termasuk peminat yang selama ini terus memberi sokongan kepada industri muzik dan artis kita. Secara peribadi, saya juga ucapkan selamat hari raya, maaf zahir batin buat semua ahli Papita dan rakan media massa yang banyak memberi sokongan. Kita juga rakamkan tahniah dan selamat Aidilfitri kepada pucuk pimpinan negara yang baru, Datuk Seri Abdullah Ahmad Badawi, semua menteri kabinet dan jabatan kerajaan yang banyak menyokong Papita. Hari baik bulan baik, kita ambil iktibar untuk memperbaiki diri dan mengeratkan tali silaturahim."

HABSAH HASSAN (Pengerusi MACP)

"SAYA dan seluruh warga MACP mengucapkan kepada semua umat Islam warga artis dan peminat seni tanah air, selamat Aidilfitri, maaf zahir dan batin. Semoga kemeriahan hari lebaran ini membawa seribu erti dan keinsafan kepada kita. Kepada artis semoga tamatnya Ramadan ini menjadi titik baru kepada kita untuk menjadi yang terbaik dan semoga industri hiburan tanah air terus gemilang dengan sokongan rakyat Malaysia."

AHMAD IBRAHIM (Presiden FDAM)

"SELAMAT hari raya kepada semua warga artis, pelakon, pekerja filem terutama pengarah filem dan drama di seluruh Malaysia. Pihak FDM juga mengucapkan selamat hari raya kepada Tun Dr Mahathir dan isteri serta Perdana Menteri Malaysia yang disanjung, Datuk Abdullah Ahmad Badawi dan isteri semoga kepemimpinan Perdana Menteri baru ini dapat menyemarakkan lagi industri perfileman tanah air. Tidak dilupa juga kepada Tan Sri Khalil dan timbalannya serta KSU dan kerabat Kementerian Penerangan termasuk Jabatan Penerangan, Jabatan Penyiaran dan Finas. Semoga pada tahun akan datang, kerjasama dapat dieratkan lagi antara FDAM dan agensi kerajaan yang lain."

SYED MOHAMED HASSAN (Presiden PPFM)

PERSATUAN Pekerja Filem Malaysia turut mengucapkan selamat hari raya kepada semua warga filem dan artis di negara ini serta kepada peminat filem Malaysia. Atas semangat hari lebaran, PPFM juga memperbaharui tekad untuk memperbaiki kelemahan dan mengambil peluang ini untuk mengeratkan silaturrahim serta kemesraan sesama warga filem dan masyarakat seni umumnya. Kepada rakyat Malaysia, teruslah menyokong perfileman bangsa sendiri. Selamat Aidilfitri juga ditujukan kepada pembaca Berita Harian."

ZAIENAL ABIDIN OMAR (Pengerusi Kehormat Karyawan)

"TERLEBIH dulu saya mengucapkan selamat hari raya kepada semua ahli Karyawan dan penggiat seni di seluruh tanah air. Saya juga berharap kepemimpinan kerajaan baru yang dipimpin Pak Lah dapat memberikan cahaya lebih cerah kepada industri hiburan serta memartabatkannya hingga ke peringkat antarabangsa. Semua karyawan harus berani menghadapi cabaran dan melangkah ke era globalisasi. Kalau boleh saya mahu semua penggiat seni terus meningkatkan kreativiti masing-masing dan bersatu demi industri

kita."